

MEMORIA XUSTIFICATIVA DA IMPOSIBILIDADE DE CONCORRENCIA PÚBLICA DO CONVENIO DE COLABORACIÓN ENTRE A AXENCIA PARA A MODERNIZACIÓN TECNOLÓXICA DE GALICIA E O CONSORCIO PARA O DESENVOLVEMENTO DE APLICACIÓNS INFORMÁTICAS DE XESTIÓN UNIVERSITARIA DE GALICIA PARA O APOIO ÁS ACTIVIDADES EN MATERIA DE SOFTWARE LIBRE

Axencia para a Modernización Tecnolóxica de Galicia é unha axencia pública autonómica, creada polo *Decreto 252/2011 do 15 de decembro, modificado polo Decreto 9/2021, do 21 de xaneiro, polo que se suprime o Centro Informático para a Xestión Tributaria, Económico-Financeira e Contable (Cixtec) e se modifica o Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos*, que ten como obxectivos básicos a definición, o desenvolvemento e a execución dos instrumentos da política da Xunta de Galicia relativa a tecnoloxías da información e comunicacións, así como innovación e desenvolvemento tecnolóxico de Galicia

Segundo o artigo 9 do estatuto da Axencia para a Modernización Tecnolóxica de Galicia aprobado polo *Decreto 9/2021, do 21 de xaneiro, polo que se suprime o Centro Informático para a Xestión Tributaria, Económico-Financeira e Contable (Cixtec) e se modifica o Decreto 252/2011, do 15 de decembro, polo que se crea a Axencia para a Modernización Tecnolóxica de Galicia e se aproban os seus estatutos*, a Amtega ten entre as súas competencias a dirección e xestión de todas as actuacións da Xunta en materia de tecnoloxías da información e as comunicacións e o deseño e liderado de iniciativas que contribúan a impulsar o desenvolvemento da Sociedade da información en Galicia, garantindo os dereitos dos cidadáns e eliminando as barreiras que se opoñan á expansión e ao uso das novas tecnoloxías.

A Amtega ten entre os seus obxectivos prioritarios, lograr un desenvolvemento efectivo da Sociedade da Información na Comunidade Autónoma de Galicia, promovendo aquelas accións que faciliten e impulsen a incorporación de toda a sociedade aos novos recursos tecnolóxicos da información e das comunicacións e a implicación dos cidadáns galegos na utilización das novas tecnoloxías como factor xerador de novas capacidades, de emprego e de desenvolvemento económico.



o Consorcio para o Desenvolvemento de Aplicacións Informáticas de Xestión Universitaria (CIXUG), é o único ente especializado en materia de software libre no ámbito universitario que reúne ademais a característica de estar integrado polas tres universidades galegas (Universidade da Coruña, Universidade de Santiago de Compostela e Universidade de Vigo), o dito consorcio realiza as súas tarefas co obxectivo de impulsar a incorporación de mellores prácticas aos procesos asociados á xestión académica, xestión de investigación e xestión económica que permitan o deseño e o desenvolvemento de solucións informáticas que apoien a xestión universitaria e a integración de datos e información en coñecemento.

O convenio que se pretende asinar entre a Amtega e CIXUG ten por obxecto o financiamento da realización das seguintes actuacións para o fomento do uso e divulgación do Software Libre no ámbito universitario en Galicia:

- Accións de formación sobre aplicacións específicas en software libre, así como formación técnica orientada ao persoal de soporte das aulas.
- Elaboración e adaptación de maquetas e recompilacións instalábeis de software libre que contribúan a incrementar o coñecemento e o nivel formativo de distintos colectivos sociais no uso do software libre.
- Realización de labores de difusión podendo empregar con este fin, os seguintes medios: reforzamento do actual repositorio de software libre, reelaboración de contidos procedentes de fontes externas para a súa posta a disposición a través do mesmo, así como publicación dos resultados das actuacións desenvolvidas.
- Organización de eventos para a difusión de contidos ou ferramentas e para a promoción de iniciativas que resulten de interese específico, así como apoio na organización de eventos considerados de interese pola Amtega, relacionados co software libre.
- Asesoramento á comunidade universitaria e á sociedade en xeral sobre aspectos relacionados co software libre.
- Realización de proxectos de desenvolvemento no ámbito da universidade para a difusión e incremento do uso do software libre nas mesmas, como por exemplo



proxectos de migración do software de xestión, instalación de software libre nas aulas.

- Fomento da produción de documentación en galego e tradución de aplicacións de software libre mediante accións directas de dinamización nos contornos empresariais e universitarios, establecendo medidas de incentivo e recoñecemento.

A achega económica da Amtega ao abeiro do convenio que se pretende formalizar ten un carácter de interese público, e contribuirá a:

- Desenvolver plans de formación para o crecemento da Sociedade da Información e a capacitación profesional nas tecnoloxías das comunicacións entre os profesionais e a sociedade en xeral.
- Incorporar a accesibilidade como condición indispensable das actuacións.
- Incrementar os contidos divulgativos en galego en Internet.
- Difusión e divulgación das vantaxes da incorporación das TIC en todos os sectores, así como do sector profesional das TIC.
- Contribuír á igualdade de xénero no sector das TIC.

Tendo en conta, por unha banda a importancia destas actuacións como un medio máis para contribuír de forma eficaz e complementar ás políticas de dinamización da implantación da Sociedade da Información en Galicia da Amtega, e por outra que CIXUG é o único ente especializado en materia de software libre no ámbito universitario que reúne ademais a característica de estar integrado polas tres universidades galegas e ten como obxectivo o obxecto final deste convenio, por razóns de eficacia e efectividade, resúltalle de aplicación a lei 1/2016, do 18 de xaneiro, de transparencia e bo goberno e o artigo 26.2 da Lei 9/2007, do 13 de xullo, de subvencións de Galicia.



E para que conste e produza os efectos oportunos da declaración expresa prevista no devandito precepto legal, asino o presente documento en Santiago de Compostela,

O xerente da Axencia para a Modernización Tecnolóxica de Galicia

José Luis Somoza Digón

